

第二五五册

明倫彙編

宮闈典

外戚部

宦寺部

(卷)

二七一三〇

三一一三六

古今圖書集成

中華書局影印



古今圖書集成

卷一百一十五

欽定古今圖書集成明倫彙編官闈典

第一百十七卷目錄

外戚部列傳十五

宋三

鄭興裔

朱伯材

吳益吳蓋

潘末壽

張萃

劉仇

夏執中

蔡滂

韓同卿

楊谷

金

雷速

斐滿達

徒單恭

李石

徒單貞

烏論答暉

李湘

元

特薛禪

鎖郎哈

韋淵

邢煥

吳琚

潘永思

劉懋

郭瑛

謝淵

李道

楊次山

楊石

阿魯速

忽覲

張汝弼

李獻可

徒單銘

蒲察鼎壽

徒單四喜

鎖兒哈

官闈典第一百十七卷
外戚部列傳十五

宋三

鄭興裔

按宋史外戚傳興裔字光錫初名興宗顯肅皇后外家三世孫也曾祖紳封樂平郡王祖翼之陸海軍節度使父蕃和州防禦使興裔早孤叔父藻以子字之分以餘貲興裔不受請立義莊贍宗族及藻沒遂解官致追報之義初以后恩授成忠郎充幹辦祇候庫聖獻后葬充攢宮內外巡檢累至江東路鈴轄乾道初建康留司請治行宮備巡幸興裔奏勞人費財乞罷其役且言都統及馬軍帥皆非其人徙福建路兵馬鈴轄過闕入見詢以守令臧否興裔條析以對帝曰卿識時務習吏事行當用卿會復置武臣提刑就命爲之加遙領高州刺史郡縣積玩檢驗法廢興裔柳爲格目分界屬縣吏不得行其姦因著爲令建劍汀邵鹽筴屢更漕臣請易綱運爲鈔法典極言其不可海寇倏去忽來調兵無常及興裔請置澳長寇至徑率民兵禦之又言禁兵事藝不精多充私役乞行禁止尉以捕盜改秩多爲當加審實帝善其數論事詔加成州團練使時傳聞金欲敗盟召興裔爲賀生辰使以覲之使還言無他卒如所料累差浙東浙西江東提刑請祠以歸尋詔知閤門事兼幹辦皇城司又兼樞密副都承旨軍婦殺鄰舍兒取其臂釧而棄其屍獄成刑部以無證左出之命興裔覆治得實帝喜賜居第丁母憂去官服闋復故職除均州防禦使再使金還遷潭州觀察使復請祠起知廬州移

知揚州揚與廬爲鄰初興裔在廬嘗卻鄰道互送禮至是按郡籍見前所卻者有出無歸遂奏嚴其禁揚有重屯糧之例糴他境與裔拮括濫漏以補之食遂足民舊皆茅舍易焚興裔貨之錢命易以瓦自是火患乃息又奏免其償民甚德之修學宮立義塚定部轄民兵升差法郡以大治楚州議改築城有謂韓世忠遺基不可易者命興裔往視既至闕地丈餘增築之帝閱奏喜曰興裔不吾欺也紹興元年遷保靜軍承宣使召領內祠充明堂大禮都大主管大內公事寧宗卽位除知明州兼沿海制置使告老授武泰軍節度使卒年七十四贈太尉諡忠肅興裔歷事四朝以材名結主知中興外族之賢未有其比子三人挺以橫行團練使歷淮襄兩道帥損登進士甲科與抗皆有位於朝

韋淵

按宋史外戚傳淵顯仁太后季弟也靖康末官至拱衛大夫忠州防禦使勾當軍頭引見司金人退張邦昌遣淵持書遺康王于濟南王卽位遷親衛大夫寧州觀察使知東上閤門事言橫行五司尙未遵元豐舊制乞併引進司歸客省東西上閤門合而爲一以省冗費從之遂命同管客省四方館閤門事淵性暴橫不循法度帝慮其有過難於行法遂遷福建路副總管淵引疾丐祠許之淵乃言自宣和及今十二年未嘗磨勘乞遷秩吏部言在法橫行無以年勞磨勘者帝遂不許久之落階官除德慶軍節度使召赴行在除開府儀同三司會建康軍帥邊順疾篤留守呂頤浩奏以淵代帝不欲以戚里管軍不許淵陳乞恩

數帝詢太后家故例賜田五十頃房緡錢日二十千帝久不予淵官聞太后將入境乃封平樂郡王令逆於境上既從后歸即令致仕又詔奉朝請遷少師淵在內不得逞乞致仕任便居住從之未幾帝恐其肆橫於外復詔落致仕還居賜第太后朝景靈宮淵見后出言詆毀詔侍御史余堯弼即其家鞠治淵具狀誣罔責授寧遠軍節度副使袁州安置數年復故職累遷太保太傅卒贈太師子三人訊謙諱訊紹與中官至達州刺史坐過用太后旨降武德郎與嶺外監當謙好學能詩官至建康軍節度使謙子璞淳熙末仕至太府少卿高宗崩擢司農少卿為金國告哀使金主錫宴其館使欲用樂璞不可自朝至夜漏下三十刻金人不能奪及入見其閣門令璞吉服入璞又不可日將中乃以凶服見紹熙初除煥章閣論者以為非祖宗舊制遂換授明州觀察使十年不遷寧宗嘉其恬退授清遠軍節度使致仕卒贈太尉

朱伯材

按宋史朱皇后傳后開封祥符人父伯材武康軍節度使欽宗即位追封伯材為恩平郡王慶元三年上后號諡推恩后家十五人后兄二人孝孫靖康中以節鉞授右金吾衛上將軍卒贈開府儀同三司孝章一日孝莊官至末慶軍承宣使卒贈昭化軍節度使

邢煥

按宋史外戚傳煥字文仲開封人以父任調孟州汜水縣主簿監在京藥局平準務茶場以勞改宣德郎莫州司錄移知開封府陽武縣都大提舉開德大名府堤埽歷開封府七十儀曹詔納其女為康王妃靖

康初主管亳州明道宮王即位升右文殿修撰進徽猷閣待制諫議大夫衛膚敏言后父不當班從臣遂改光州觀察使除樞密都承旨煥屢奏馬伸言事切當崇澤忠勞可倚黃潛善汪伯彥誤國其言多所裨益遷保靖軍承宣使苗劉之變煥自度不能爭過病免兼提舉萬壽觀求去不已改江州太平觀遂徙居忠州紹興二年入對首陳川陝形勢利害請幸荆南分兵以圖恢復凡數百言帝甚嘉之復以為都承旨引疾不拜擢慶遠軍節度使提舉洞霄宮煥涉學有文節儉自持未嘗恃恩私請識者取焉是年卒贈開府儀同三司諡恭簡加贈少師追封嘉國公

吳益 吳蓋

按宋史外戚傳益字叔謙蓋字叔平俱憲聖皇后弟也益建炎末以恩補官累遷幹辦御筆院帶御器械蓋紹興五年以恩補官累遷宣贊舍人帝與后皆喜翰墨故益蓋兄弟師法亦有書名后受冊推恩益加成州團練使蓋加文州刺史帝為置皇后宅大小學教授以王鉉為之鉉明經善訓導益蓋折節事之益娶秦檜長孫女又與王繼先交相薦引故三家姻族皆躋美官益歷官至保康軍節度使加太尉儀同三司初既建節以檜故授文資直祕閣檜進徽宗御製辭免加恩帝乃特命賜益三品服累加祕閣修撰直徽猷閣以檜提舉編修寬恤詔令又加益直寶文閣檜死其子煥復請於帝又升敷文閣待制中丞湯鵬舉言益以庸瑱之才恃親昵之勢乞覲職名以示至公帝謂鵬舉所論甚切當然朕於檜檜日論檜妻子許以保全其家今若遽出其壻則傷恩臣僚無得更

有論列自是不復遷顯仁太后葬為撰官總護使始進少保孝宗嗣位進少傅又進太師封太寧郡王乾道七年卒年四十八諡莊簡追封衛王蓋官至武寧軍節度使亦累升太尉開府儀同三司少保封新興郡王乾道二年卒年四十二贈太傅追封鄭王

吳玠

按宋史外戚傳玠字琚習吏事乾道九年特授添差臨安府通判其後歷尚書郎部使者換資至鎮安軍節度使復以才選除知明州兼沿海制置使寧宗初乃得祠奉朝請尋知鄂州再知慶元府位至少師判建康府兼留守卒方孝宗崩光宗以疾不能執喪大臣請太后垂簾開立寧宗玠言於后曰垂簾可暫不可久后遂以翌日徹簾玠嘗使金人嘉其信義玠死後宋遣使至金議和屢不合金人言南使中惟吳玠言為可信玠弟瑋仕至保靜軍節度使蓋子環亦至昭化軍節度使

潘耒壽

按宋史潘賢妃傳妃開封人元懿太子母也父耒壽直翰林醫局官高宗即位立為賢妃贈耒壽太子少師

潘耒思

按宋史外戚傳耒思賢妃叔父也妃初進封詔以梁師成第賜耒思建炎初為閤門宣贊舍人帶御器械元祐太后在虔帝遣耒思近歸權三省樞密事盧益頗與之交結為諫官吳表臣所論范宗尹請出耒思帝曰未可姑罷祿以困之庶知悔過遂奪職既而辛企宗言耒思嘗捕魔賊有功復為帶御器械未幾大

理推治偽告事連末思帝曰末思雖戚里既有過安可廢法乃罷職就逮獄成追一官尋復爲閤門宣贊舍人遷同知閤門事末思乞增給殮錢戶部言其不應格法乃止紹興八年自右武郎擢右武大夫知閤門事尋卒

張萃

按宋史張賢妃傳妃開封人弟萃閤門宣贊舍人妃薨遷秩二階

劉懋

按宋史劉貴妃傳妃臨安人父懋累官昭慶軍節度使金人南侵獻錢二萬緡以助軍典費子允升紹興末爲和州防禦使知閤門事奉使還遷荊州防禦使福州觀察使

劉伉

按宋史劉婉儀傳婉儀兄伉累官和州防禦使知閤門事婉儀既廢乃與祠罷歸

郭城

按宋史成穆郭皇后傳后開封祥符人奉直大夫直卿之女孫其六世祖章穆皇后外家父城累官昭慶軍承宣使追封榮王孝宗待郭氏恩禮彌厚然不假外戚以官爵后弟師禹師元官不過承宣使師元不及建節而卒將內禪師禹始除節度使光宗朝官至太保封末寧郡王

夏執中

按宋史成恭夏皇后傳后袁州宜春人曾祖令吉爲吉水簿初后之生也有異光穿室父協奇之及長以姿納宮中久之父居益困及歸客袁之僧舍號夏翁

翁亡后始貴訪得其弟執中補承信郎閤門祇候未幾遷右武郎閤門宣贊舍人累遷奉國軍節度使提舉萬壽觀寧宗即位加少保踰年卒於家初執中與其微時妻至京宮人諷使出之擇配貴族欲以媚后執中弗爲動他日皇后親爲言執中誦宋弘語以對后不能奪既貴始從師學作大字頗工復善騎射高宗行慶壽禮近戚爭獻珍環執中獨大書一人有慶萬壽無疆以獻高宗喜賜資甚渥嘗爲館伴副使連射皆命中金人駭服孝宗聞其才將召用之謝曰他日無累陛下保全足矣人以此益賢之

謝淵

按宋史成肅謝皇后傳后丹陽人弟淵以后貴授武翼郎后嘗戒之曰主上化行恭儉吾亦躬服澣濯爾宜崇謙抑遠驕侈後歷閤門宣贊舍人帶御器械光宗朝遷果州團練使寧宗立轉萊州防禦使推知閤門事仍幹辦皇城司三遷至保信軍節度使尋加太尉開府儀同三司成肅皇后崩遺詔賜淵錢十萬緡金二千兩田十頃餽緡日十千後累陞三少封和國公嘉定四年薨贈太保

蔡傍

按宋史蔡貴妃傳妃父傍宜春觀察使

李道

按宋史外戚傳道字行之相州人其中女爲光宗后初道與兄旺聚衆歸宗澤澤因事斬旺命道掌其軍澤薨道引軍依襄陽鎮撫使桑仲仲以爲副都統制兼知隨州奏於朝授武義郎閤門宣贊舍人仲爲霍明所殺道與統制李橫率兵縋素圍明於郢明亡去

劉豫遣人持書招道道不從執其使以聞詔嘉獎之豫怒遣將穆楷攻道道拒破之除鄧隨州鎮撫使兼知鄧州時李橫已命別將守鄧道憚橫不敢受遂命仍知隨州樞密院以道能察軍情不受鎮撫之命理宜褒賞詔領榮州團練使進武義大夫胡安中守唐州勢孤不能自立遂附豫道招之安中復來歸會李成入寇鎮撫使李橫棄襄陽去道亦棄隨南歸至江州詔道屬岳飛爲選鋒軍統制入唐州擒僞將除唐鄧鄂州襄陽都統制從飛收復襄陽等郡授行營護軍累至復州防禦使果州觀察使成鄂州加中侍大夫武勝軍承宣使又升御前諸軍統制武興蠻楊再興連歲寇掠道破其衆擒再興及其二子還保寧軍承宣使率盜朱持等聚桂陽詔道移軍衡州經理道遣高仲等擊平之落階官加龍神衛四廂都指揮使遷鎮南軍承宣使金將渝盟命道以所部戍荊南府帥臣劉錡奏改爲御前前軍右軍就命道統之錡召奏事道代爲御前諸軍都統制金將劉士萼屯光化境道掩擊焚其舟芻遂遁去尋因大將言道與鄂帥不協罷踰年起授捧日天武四廂都指揮使知荊南府隆興初湖北諸司劾其過帝曰道恃戚里妄作可罷久之再爲湖北副總管及卒乃拜慶遠軍節度使贈太尉諡忠毅后既貴進封楚王孫孝友孝純皆至節度使

韓同卿

按宋史恭淑韓皇后傳后相州人其六世祖爲忠獻王琦父同卿由知泰州陞揚州觀察使母莊氏封安國夫人同卿累遷慶遠軍節度使加太尉慶元五年

卒贈太師諡恭靖同卿季父侂胄自以有定策功聲勢薰灼同卿每懼滿盈不敢干政時天下皆知侂胄爲后族不知同卿乃后父也同卿沒一年而后崩侂胄竟敗人始服其善遠權勢云同卿子竣后兄也官至承宣使

楊次山

按宋史外戚傳次山字仲甫恭聖仁烈皇后兄也其先開封人曾祖全以材武奮靖康末捍京城死事祖漸以遺澤補官仕東南家於越之上虞次山儀狀魁偉少好學能文補右學生后受職宮中次山遂霑恩得官積階至武德郎后爲貴妃累遷帶御器械知開門事丐祠除吉州刺史提舉佑神觀后受冊除福州觀察使尋拜岳陽軍節度使后謁家廟加太尉韓侂胄誅加開府儀同三司尋進少保封永陽郡王南郊恩加少傳充萬壽觀使致仕加太保授安德軍昭慶軍節度使改封會稽郡王次山能避權勢不預國事時論賢之嘉定十二年卒年八十一贈太師追封冀王子二人

楊谷

按宋史楊次山傳次山子谷至太傅保寧軍節度使充萬壽觀使末寧郡王

楊石

按宋史楊次山傳次山次子石字介之乾道間入武學以恭聖仁烈后貴賜第慶元中補承信郎差充開門看班祇候尋帶御器械嘉泰四年充賀正旦接待使時金使頗驕倨自矜其善射石從容起挽弦三發三中的金使氣沮嘉定改元除揚州觀察使知閤門

事進保寧承宣使久之授保寧節度使提舉萬壽觀奉朝請進封信安郡侯十五年以檢校少保進封開國公寧宗崩宰相史彌遠謀廢皇子竑而立成國公昀命石與谷白后后不可曰皇子先帝所立豈敢擅變谷石凡一夜七往反以告后終不聽谷等拜泣曰

內外軍民皆已歸心苟不從禍變必生則楊氏且無噍類矣后默然良久曰其人安在彌遠等召昀入遂矯詔廢竑爲濟王立昀是爲理宗授開府儀同三司充萬壽觀使時寶慶垂簾人多言本朝世有母后之聖石獨曰事豈容集言昔仁宗英宗哲宗嗣位或尚在幼冲或素絲撫育軍國重事有所未諳則母后臨朝宜也今主上熟知民事天下悅服雖聖孝天通然不蚤復政得無基小人離間之嫌乎乃密疏章獻慈聖宣仁所以臨朝之由遠及漢唐母后臨朝稱制得失上之后覽奏即命擇日徹簾進石少保封永寧郡王以壽明慈睿仁福三冊太后寶進至太傅石性恬澹每拜爵命必力辭恭聖附廟除太師兄谷疑於辭受石力言曰吾家非有元勳盛德徒以恭聖故致貴顯曩吾父不居是官吾兄弟今偃然受之是將自速顛覆耳矧恭聖抑遠族屬意慮深遠言猶在耳何可遽忘乃合疏懇辭至再三不受及屬疾除彰德集慶節度使進封魏郡王卒年七十一贈太師

留連

按金史太祖聖穆皇后傳后唐括氏天會十三年追贈后父留連太尉榮國公祖送胡本司徒英國公會祖劼適司空溫國公

阿魯速

按金史太宗欽仁皇后傳后唐括氏熙宗即位尊爲太皇太后贈后父阿魯速太尉宋國公祖實匹司徒英國公會祖阿魯瑱司空溫國公

斐滿達

按金史世戚傳滿達本名忽撻婆盧木部人爲人淳直孝友天輔六年從蒲家奴追叛寇於鐵呂川力戰有功熙宗娶忽撻女是爲悼平皇后天眷元年授世襲猛安明年以皇后父拜太尉封徐國公皇統元年除會寧牧居數歲以太尉奉朝請九年悼后死無何海陵弑熙宗欲邀衆譽揚熙宗過惡以悼后死非罪於是封忽撻爲王天德三年薨于忽都爲燕京留守以罪免居中都海陵命馳驛赴之及葬使祕書監納合椿年致祭賻銀五百兩

忽烈

按金史世戚傳忽烈天眷三年權猛安皇統元年爲行軍猛安歷橫海崇義軍節度使以后戚怙勢賊汗不法其在橫海拜富人爲父及死爲之行服而分其資在崇義諷寺僧設齋受其施及畱守中京益驕恣苟可以得財無不爲者選諸猛安富人子弟爲札野規取財物時號閑郎君朝廷以忽烈與徒單恭等汗濫至甚命秉德黜陟天下官吏忽烈以賊罷海陵以忽烈所至縱家奴擾民乃定禁外官任所閑雜人條約天德三年復起爲鄭州防禦使改安國軍節度使卒年三十九

徒單恭

按金史世戚傳恭本名斜也天眷二年爲奉國上將

軍以告吳十反事超授龍虎衛上將軍爲戶部侍郎出爲濟南尹遷會寧牧封譚國公復出爲太原尹斜也貪鄙使工給一佛像自稱嘗見佛其像如此當以金鑄之遂賦屬縣金而未嘗鑄佛盡入其家百姓號爲金總管秉德廉訪官吏斜也以賊免海陵篡立海陵后徒單氏斜也女由是復用爲會寧牧封王未幾拜平章政事海陵獵於胡刺渾水斜也編列圍場凡

平日不相能者輒杖之海陵謂宰相曰斜也爲相朕非私之今聞軍國大事凡斜也所言卿等一無所取豈不慮無一得乎他宰相無以對溫都思舉數事對曰某事本當如此斜也輒以爲如彼皆妄生異議不達事宜臣逮事康宗累朝宰相未嘗有如斜也專恣者海陵默然斜也於都堂脊杖令史馮仲尹御史臺劾之海陵杖之二十斜也猛安部人撒合出者言斜也強率取部人財物海陵命侍御史保魯鞠之保魯鞠不以實海陵杖保魯而以撒合出爲符寶祇候改隸合札猛安斜也兄定哥尚太祖長女兀魯定哥死無子以李弟之子查刺爲後斜也謀取其兄家財強納兀魯爲室而不相能兀魯嘗怨斜也斜也妾忽撻與兀魯不叶乃譖兀魯於海陵后徒單氏曰兀魯怨上殺其兄宗敏有怨望語會韓王亨改廣寧尹諸公主宗婦往賀其母兀魯以言慰亨母忽撻亦以怨望指斥譖兀魯海陵使蕭裕鞠之忽撻得幸於徒單后左驗皆不敢言遂殺兀魯斜也因而盡奪查刺家財大定間皆追正之海陵以兀魯有怨望語斜也不奏遂杖斜也免所居官俄復爲司徒進拜太保領三省事兼勸農使再進太師封梁晉國王貞元二年

九月斜也從海陵獵於順州方獵聞斜也薨即日罷獵臨其喪親爲擇葬地遣使營治及葬賜輜輶車上及后率百官祭之賜諡曰忠正隆間改封趙國公再進齊國公其妻先斜也卒海陵嘗至其葬所致祭起復其子率府率吾里補爲諫議大夫大定間海陵降爲庶人徒單氏爲庶人妻斜也降特進鞏國公

張汝弼

按金史外戚傳汝弼字仲佐父元徵彰信軍節度使元素之兄也汝弼初以父蔭補軍正隆二年中進士第調潘州樂郊縣主簿元徵妻高氏與世宗母貞懿皇后有屬世宗納元徵女爲次室是爲元妃張氏生趙王允中世宗即位於遼陽汝弼與叔元素俱往歸之擢應奉翰林文字世宗御翠巒閣召左司郎中高衍及汝弼問曰近日除授外議何如宜以實奏毋少隱也有不可用者當改之衍汝弼皆無以對自皇統以來內藏諸物費用無度吏資緣爲姦多亡失汝弼與宮籍直長高公穆入殿小底王添兒閱實之以類爲籍作四庫以貯之於是內藏庫使王可道等皆杖一百汝弼等各進階項之兼修起居注轉右司員外郎母憂去官起復吏部郎中累遷吏部尚書拜參知政事詔徙女直猛安謀克於中都給以近郊官地皆瘠薄其腴田皆豪民久佃遂專爲己有上出獵猛安謀克人前訴所給地不可種詔詔拘官田在民久佃者與之因命汝弼議其事請條約立限令百姓自陳過限許人首告實者與賞上可其奏仍遣同知中都轉運使張九思拘籍之上問高麗夏王皆稱臣使者至高麗與王抗禮夏王立受使者拜何也左丞襄對

曰故遼與夏爲甥舅夏王以公主故受使者拜本朝與夏約和用遼故禮所以然耳汝弼曰誓書稱一遵遼國舊儀今行之已四十年不可改也上曰卿等言是也上聞尚書省除授小官多不稱職召汝弼至香閣謂之曰他宰相年老卿等宜盡心汝弼對曰材薄不足以副聖意耳進拜尚書右丞於是戶部羅官倉粟汝弼請使暖湯院得糴之上讓曰汝欲積陰德邪何區區如此左丞相徒單克寧得解政務爲樞密使是日汝弼亦懷表乞致仕上使人止之曰卿年未老未可退也進左丞與族弟參知政事汝霖同日拜族里以爲榮有年未六十而乞致仕者上不許汝弼曰聖旨嘗許六十致仕上責之曰朕嘗許至六十者致仕不許未六十者且朕言六十致仕是則可行否則當言卿等不言皆此類也久之坐擅增諸皇孫食料與丞相守道右丞粘割幹特刺參政張汝霖各削官一階上曰准法當解職但示薄責耳汝弼在病告上謂宰相曰汝弼久居執政練習制度頗能斟酌人材而用心不正乃罷爲廣寧尹賜通犀帶汝弼爲相不能正諫上所欲爲則順而導之所欲爲則微言以觀其意上責之則婉辭以引過終不忤之也而上亦知之且黷貨以計取諸家名園甲第珍玩奇好士論薄之二十七年薨汝弼既與末中甥舅陰相爲黨章宗即位汝弼妻高氏每以邪言怵末中覬非望畫求中母像侍奉祈祝使術者推算末中有司鞠治高氏伏誅事連汝弼上以事覺在汝弼死後得免削奪

李石

按金史本傳石字子堅遼陽人貞懿皇后弟也先世

仕遼爲宰相高祖仙壽嘗脫遼主之舅於難遼帝賜仙壽遼陽及湯池地千頃他物稱是常以李舅目之父雖訛只桂州觀察使高末昌據東京率衆攻之不勝而死石敦厚寡言而器識過人天會二年授世襲謀克爲行軍猛安齊宗爲右副元帥引置軍中屬之宗弼八年除禮賓副使轉洛苑副使天眷元年置行臺省於汴石爲汴京都巡檢使歷大各少尹汴京馬軍副都指揮使累官景州刺史海陵營建燕京宮室石護役皇城端門海陵遷都燕京石隨例入見海陵指石曰此非葛王之舅乎葛王謂世宗也未幾除典中少尹石知海陵忌宗室頗歎前日之言秩滿託疾還鄉里世宗留守東京禦契丹括里石留東京巡察城中海陵使副留守高存福伺察世宗動靜知軍李蒲速越知存福謀以告世宗石因勸世宗先除存福然後舉事世宗從之大定元年以定策功爲戶部尚書無何拜參知政事阿瑱殺同知中都留守蒲察沙离只遣使奉表東京而羣臣多勸世宗幸上京者石奏曰正隆遠在江淮寇盜竄起萬姓引領東向宜因此時直起中都據腹心以號令天下萬世之業也惟陛下無牽於衆惑上意遂決即日啓行世宗納石女後宮生鄭王永蹈衛紹王永濟是爲元妃李氏三年戶部尚書梁球上言大定以前官吏士卒俸粟支帖眞僞相雜請一切停罷石買革去舊帖下倉支粟倉司不敢違以新粟與之上聞其事以問梁球球對不以實上命尚書左丞翟永固鞠之球削官四階降知火山軍石罷爲御史大夫久之封道國公六年上幸西京石與少詹事烏古論三合守衛中都宮闕詔曰

京師巡禦不可不嚴近都猛安內選士二千人巡警仍給口麥芻粟謂宰臣曰府軍錢幣非徒聚貨也若軍士貧弱百姓困乏所費雖多豈可已哉故事凡行幸留守中都官每十日表問起居上以使傳頻煩命二十日一進表七年拜司徒兼太子太師御史大夫如故賜第一區安化軍節度使徒單子溫平章政事合喜之姪也賊盜不法石即劾奏之方石奏事宰相下殿立俟良久既退宰相或問石奏事何久石正色曰正爲天下茲汚未盡誅耳聞者悚然一日上謂石曰御史分別庶官邪正卿等惟効有罪而未嘗舉善也宜令監察分路刺舉善惡以聞石司憲既久年浸高御史臺奏事有在制前斷定乞依新條改斷者上曰若在制前行者豈可改也上御香閣召中丞移刺道謂之曰李石老矣汝等宜盡心向所奏事甚不當豈涉於私乎他日又謂石曰卿近累奏皆常事臣下善惡邪正無語及之卿年老矣不能久居此若能舉一二善士亦不負此職也九年進拜太尉尙書令詔曰太后兄弟惟卿一人故命領尙書事軍國大事涉於利害議其可否細事不煩卿也進封平原郡王平章政事先顏守道奏事石神色不懌世宗察之謂石曰守道所奏既非私事卿當共議可否在上位者所見有不可順而從之在下位者所見雖當則違不從乎豈可以與己相違而蓄怒哉如此則下位者誰敢復言石對曰不敢上曰朕欲於京府節鎮運司長佐三員內任文臣一員尚未得人石奏曰資考未至不敢擬上曰近觀節度轉運副使中才能者有之海陵時省令史不用進士故少尹節度轉運副使中乏人

大定以來用進士亦頗有人矣節度轉運副使中有廉能者具以名聞朕將用之朝官不歷外任無以見其才外官不歷隨朝無以進其才中外更試庶可得人他日上復問曰外任五品職事多闕何也石對曰資考少有及者上曰苟有賢能當不次用之對不稱旨上表乞骸骨以太保致仕進封廣平郡王十六年薨上輟朝臨弔哭之慟賻錢萬貫官給葬事少府監張僅言監護親王宰相以下郊送諡襄簡石以勳戚久處腹心之寄內廷獻替外罕得聞觀其劾奏徒單子溫退答宰臣之問氣岸宜有不能堪者時論得失半之亦豈以是耶舊史載其少貧貞懿后周之不受曰國家方急用人正宜自勉何患乎貧后感泣曰汝苟能此吾復何憂及中年以冒粟見斥衆譏食鄙如出二人史又稱其未貴人有慢之者及爲相其人以事見石惶恐石曰吾豈念舊惡者待之彌厚能爲長者言如是又與他日氣岸迥殊山東河南軍民交惡爭田不絕有司謂兵爲國根本姑宜假借石持不可曰兵民一也孰輕孰重國家所恃以立者紀綱耳紀綱不明故下敢輕冒惟當明其疆理示以法禁使之無爭是爲長久之術趣有司拯問自是軍民之爭遂息北京民曹貴謀反大理議廷中謂貴等陰謀久不能發在法詞理不能動衆威力不足率人罪只論斬石是之又議從坐久不能決石曰罪疑惟輕入詳奏其狀上從之緣坐皆免死北鄙咸驚朝廷欲發民穿深塹以禦之石與丞相紹石烈良弼皆曰不可古築長城備北徒耗民力無益於事北俗無定居出沒不常惟當以德柔之若徒深塹必當置戍而塞北多風

沙曾未期年璽已平矣不可疲中國有用之力爲此無益議遂寢是皆足稱云世宗在位幾三十年尚書令凡四人張浩以舊官完顏守道以功徒單克寧以顧命石以定策他無及者明昌五年配享世宗廟廷子獻可達可

李獻可

按金史李石傳石子獻可字仲和大定十年中進士第世宗喜曰太后家有子孫舉進士甚盛事也累官戶部員外郎坐事降清水令召爲大興少尹遷戶部侍郎累遷山東提刑使卒衛紹王卽位以元舅贈特進追封道國公子道安擢符寶郎

徒單貞

按金史本傳貞本名特思忒黑闥刺人也祖抄從太祖伐遼有功授世襲猛安父婆盧火以戰功累官開府儀同三司貞娶遼王宗幹女海陵同母弟也皇統九年貞與海陵俱弑熙宗海陵既立以貞爲左衛將軍封貞妻平陽長公主貞爲駙馬都尉殿前左副點檢轉都點檢兼太子少保封王改大典尹都點檢如故俄授臨潢府路昏斯魯猛安居二年海陵召貞勛之曰汝自幼常在左右頗著微勞而近日乃怠忽縱有罪樹私恩凡人富貴而驕皆死徵也汝若不制汝心將無所不至賜之死復何辭朕念弟襲及公主與朕同胞故少示懲戒貞但號泣卽日解點檢職仍爲大典尹復戒之曰今而後能以勤自勵朕當思之不然黜爾歸田里矣逾月復爲都點檢大典尹如故正隆二年例封藩遷樞密副使賜佩刀入宮轉同判大宗正事海陵將伐宋詔朝官除三國使人宴飲其

餘飲酒者死六年正月四日立春節益都尹京安武節度使爽金吾上將軍阿速飲於貞第海陵使周福兒錫土牛至貞第見之以告海陵召貞詰之曰戎事方殷禁百官飲酒卿等知之乎貞等伏地請死海陵數之曰汝等若以飲酒殺人太重固當諫古人三諫不聽亦勉從君命魏武帝軍行令曰犯麥者死已而所乘馬入麥中乃割髮以自刑犯麥微事也然必欲以示信朕爲天下主法不能行於貴近乎朕念慈憲太后子四人惟朕與公主在而京等皆近屬曲貸死罪於是杖貞七十京等三人各杖一百降貞爲安武軍節度使京爲澤州刺史爽歸化州刺史無何拜貞御史大夫以本官爲左監軍從伐宋至揚州海陵死北還見世宗於中都詔以貞女爲皇太子妃除貞爲太原尹改咸平貞在咸平貪汙不法累貶鉅萬徙貞定尹事覺世宗使大理卿李昌圖鞠之貞卽引伏昌圖還奏上問之曰貞停職否對曰未也上怒抵昌圖罪復遣刑部尚書移刺道往眞定問之徵其贓還主有司徵給不以時詔先以官錢還其主而令貞納官凡還主贓皆準此例降貞爲博州防禦使降貞妻爲清平縣主項之遷震武節度使遣使者往戒勅之詔曰朕念卿懿戚不待終考更遷大鎮非常之恩不可數得卿勿蹈前過轉河中尹進封其妻爲任國公主賜黃金百兩重綵二十端賜貞擊毬馬二匹改東京畱守賜玉吐鵲弓矢賜貞妻錢萬貫有司奏海陵已貶爲庶人宗幹不當猶稱帝於是宗幹有社稷功詔追封爲遼王其子孫及諸女皆降貞妻降永平縣主貞自儀同三司降特進等猛安不稱駙馬都尉再

徒臨潢尹初與弑熙宗凡九人海陵以暴虐自斃秉德辯忽土阿里出虎以疑見殺帶以妻頌李老僧以反誅至是貞與大典國尚在而與國擯棄不用獨貞以世姻籍恩寵雖夫婦降削爵號而世宗慮久遠終不以私恩曲庇久之詔誅貞及其妻與二子慎思十六而有其諸孫俄而與國亦誅皇統逆黨盡矣章宗卽位尊母皇太子妃爲皇太后追封貞爲太尉梁國公貞祖抄司空齊國公父婆盧火司徒齊國公貞妻梁國夫人子隨補火慎思十六俱爲領國上將軍無何再贈貞太師廣平郡王諡莊簡貞妻進封梁國公主

徒單銘

按金史世威傳銘字國本顯宗賜名重泰祖貞別有傳父特進涇國公性重默寡言粗通經史事母盡孝大定末充奉御章宗卽位特勅襲中都路渾特山猛安明昌五年授尚醞署直長累遷侍儀司令宿直將軍尚衣局使兵部郎中與大理評事孫人鑑爲採訪使覆按提刑司事改右衛將軍轉左衛出爲永定軍節度使移河東北路按察使轉運使大安三年改知大名府就陞河北東西大名路安撫使大名薦饑重困銘乞大出交鈔以賑之崇慶初移知眞定府復充河北東西大名路宣撫使至寧元年九月奉迎宣宗於彰德府俄拜尚書右丞出爲北京留守以路阻不能赴貞祐二年卒

烏論答暉

按金史世威傳答暉本名謀良虎明德皇后兄也天眷初充護衛以捕宗磐宗舊功授忠勇校尉遷明威

將軍從宗弼北征還廣威將軍賞以金幣尚廐擊毬馬久之除殿中侍御史再除蒲速碗群牧使謹畜牧不事遊宴孳產蕃息進秩改特滿羣牧使世宗即位召見行在除中都兵馬都指揮使世宗至中都將遣使於宋以暉爲使世宗曰暉嘗私用官錢五百貫迺數其罪而罷之遣高忠建往因謂宰臣曰朕於賞罰毫髮無所假借果公廉辦治雖素所不喜必加升擢若抵冒公法雖至親不少恕遷都點檢兼侍衛親軍副都指揮使卒遣官致祭皇太子諸王百官會喪賻銀千兩重綵四十端絹四十匹詔以暉第三子天錫世襲納鄰河猛安親管謀克

蒲察鼎壽

按金史世威傳鼎壽本名和尚上京曷速河人欽懷皇后父也賦性沈厚有明鑒通契丹漢字長於吏事尚熙宗女鄭國公主貞元三年以海陵女弟慶宜公主子加定遠大將軍爲尚衣局使累官器物局使大定二年加駙馬都尉職如故歷符寶郎蠡州刺史濟州防禦使有惠政兩州百姓刻石紀之遷泰軍軍節度使歷東平府橫海軍入爲右宣徽使改左宣徽授中都路皆得渾山猛安曷速木單世襲謀克改河間尹號令必行豪右屏跡有宗室居河間侵削居民鼎壽奏徙其族於平州郡內大治卒官上聞之深加悼惜喪至香山皇太子往奠百官致祭賻銀綵絹明昌三年以皇后父贈太尉越國公鼎壽既世連姻戚女爲皇后長子辭不失凡三尚定國景國道國公主其寵遇如此未嘗以富貴驕人當時以爲外戚之冠云

李湘

按金史后妃傳元妃李氏父湘母王盼兒皆微賤大定末以監戶女子入宮大愛幸父湘追贈金紫光祿大夫上柱國隴西郡公祖父曾祖父皆追贈兄喜兒舊嘗爲盜與弟鐵哥皆擢顯近勢傾朝廷風采動四方射利競進之徒爭趨走其門南京李炳中山李著與通譜系超取顯美胥持國附依以致宰相怙財固位上下紛然知其姦蠹不敢擊之雖擊之莫能去也自欽懷皇后沒世中宮位虛久章宗意屬李氏而國朝故事皆徒單唐括蒲察拏懶僕散紇石烈烏林答烏古論諸部部長之家世爲姻婚娶后尚主而李氏微甚至章宗果欲立之大臣固執不從臺諫以爲言帝不得已進封爲元妃而勢位熏赫與皇后侔矣兄喜兒累官宣徽使安國軍節度使弟鐵哥累官近侍局使少府監太安元年四月詔曰近者有訴元妃李氏潛計負恩自泰和七年正月章宗嘗違豫李氏與新喜竊議爲儲嗣未立欲令官人詐作有身計取他兒詐充皇嗣遂於年前閏月十日因賈承御病嘔吐腹中若有積塊李氏與其母王盼兒李新喜謀令賈氏詐稱有身俟將臨月於李家取兒以入月日不偶則規別取以爲皇嗣章宗崩謀不及行當先帝彌留之際命平章政事先顏匡都提點中外事務明有勅旨我有兩宮人有娠更令召平章左右並聞斯語李氏并新喜乃敢不依勅旨欲喚喜兒鐵哥事既不克竊呼提點近侍局烏古論慶壽與計因品藻諸王議復不定知近侍局副使徒單張僧遣人召平章已到宣華門外始發勘同平章入內一遵遺旨以定大事方先帝疾危數召李氏李氏不到及索衣服李

氏承召亦不卽來猶與其母私議先皇平昔或有幸御李氏嫉妒令女巫李定奴作紙木人鴛鴦符以事魘魅致絕聖嗣所爲不軌莫可殫陳事既發遣大臣按問俱已款服命宰臣往審亦如之有司議法當極刑以其久侍先帝欲免其死王公百僚執奏堅確令賜李氏自盡王盼兒李新喜各正典刑李氏兄安國軍節度使喜兒弟少府監鐵哥如律仍追除復係監籍於遠地安置

徒單四喜

按金史世威傳四喜哀宗皇后之弟也正大九年正月丁酉夜四喜內侍焉福惠至自歸德時河朔已失利京城猶未知二人被旨迎兩宮遂託以報捷執小黃旗以入至則奏兩宮以奉迎之意是日召二相入議二相及烏古孫奴申諫不可行四喜作色曰我奉制旨迎兩宮有敢言不行者當以別勅從事矣二相不復敢言行議遂決制旨所取兩宮柔妃裴滿氏及令人張秀藥都轄承御湯藥皇乳母華國夫人等十餘人外皆放遣之又取宮中寶物馬蹄金四百枚大珠如栗黃者七千枚生金山一龍腦板二及信瑞御璽仍許賜忠孝軍以兩宮隨行物之半壬寅太后御仁安殿出銚金及七寶金洗分賜忠孝軍是夜兩宮騎而出至陳畱見城外二三處火起疑有兵遲回問奴申初不欲行卽承太后旨馳還癸卯入京頃四喜家少頃還宮復議以是夜再往太后德於鞍馬不能動遂止明日崔立變四喜木甲塔失不及塔失不之父咬住四喜妻完顏氏以忠孝卒九十七騎奪曹門而出將往歸德不得出轉陳州門亦爲門卒所止門

帥裕州防禦使阿不罕斜合已遁去經歷官完顏合住權帥職麾門卒放塔失不等去且日罪在我非汝等之過明日立以數十騎召合住合住自分必死易衣冠而往立左右扼腕欲加刃立遙見問汝是於忠孝軍出門者耶合住曰然天子使命某實放之罪在某立忽若有所省顧羣卒言此官人我識之前築裏城時與我同事我所部十餘卒盜官木罪當死此官人不之問但答數十而已此家能殺人能救人因好謂合住曰業已放出吾不汝罪也四喜等至歸德上驚問兩宮何如二人奏京城軍變不及入宮上曰汝父汝妻獨得出耶下之獄皆斬於市

元

特薛禪

按元史本傳特薛禪姓字思忽兒弘吉刺氏世居朔漠本名特因從太祖起兵有功賜名薛禪故兼稱曰特薛禪女曰孛兒台太祖光獻翼聖皇后子曰按陳從太祖征伐凡三十二戰平西夏斷潼關道取回紇尋斯干城皆與有功歲丁亥賜號國舅按陳那顏壬辰賜銀印封河西王以統其國族丁酉賜錢二十萬緡有旨弘吉刺氏生女世以爲后生男世尚公主每歲四時孟月聽讀所賜旨世世不絕又賜所俘獲軍民五千二百仍授萬戶以領之按陳薨葬官人山元貞元年二月追封濟寧王諡忠武妻哈眞追封濟寧王妃子幹陳歲戌授萬戶尚睿宗女也速不花公主幹陳薨葬不海韓弟納陳歲丁巳襲萬戶奉旨伐宋攻釣魚山又從世祖南涉淮甸下大浦口獲船百餘艘又率兵平山東濟兗單等州及阿里不哥叛中

統二年與諸王北伐以其子哈海脫歡幹羅陳等十人自從至於莽來由失木魯與阿里不哥之黨八兒哈八兒思等戰追北至字羅克禿復戰自旦及夕斬首萬級僵尸被野薨葬未懷禿禿羅陳薨萬戶尚完澤公主完澤公主薨繼尚眞公主至元十四年薨葬拓刺里無子弟曰帖木兒至元十八年襲萬戶二十四年乃顏叛從帝親征以功封濟寧郡王賜白金蓋以寵之二十五年諸王哈丹禿魯干叛與諸王及統兵官玉速帖木兒等率兵討之由龜刺兒河與哈丹等遇轉戰至惱木連河殲其衆帝賜名按察兒禿那顏以旌其功薨葬未懷禿禿二人長曰瑯阿不刺次曰桑哥不刺皆幼至元二十七年以其弟蠻子台襲萬戶亦尚囊加眞公主成宗即位封皇姑魯國大長公主以金印封蠻子台爲濟寧王奉旨率本部兵討叛王海都篤哇既與之遇方約戰行伍未定單騎突入陣中往復數四敵兵大擾一戰遂大捷時武宗在藩邸統大軍以鎮朔方有旨令蠻子台總領蒙古軍民官輔武守莽來以遏北方囊加眞公主薨繼尚裕宗女喃哥不刺公主蠻子台薨年五十有二大德十一年三月按答兒長子瑯阿不刺襲萬戶尚祥哥刺吉公主六月封大長公主賜瑯阿不刺金印加封魯王至大二年賜平江稻田一千五百頃皇慶間加封皇姊大長公主天曆間加號皇姑徵文懿福眞壽大長公主至大三年瑯阿不刺薨葬未懷禿禿阿里嘉室利瑯阿不刺嫡子也至大三年甫八歲襲萬戶四年七月襲封魯王尚朵兒只班公主元統元年阿里嘉室利薨至順間封朵兒只班號肅雍賢寧公主

桑哥不刺者魯王瑯阿不刺之弟阿里嘉室利之叔也自幼奉世皇旨養於幹可珍公主所是爲不只兒駙馬後襲統其本部民四百戶成宗時奉旨尚晉納公主至順間封鄆安大長公主授桑哥不刺金印封鄆安王職千戶元統元年授萬戶二年三月加封鄆安公主號皇姑大長公主加封桑哥不刺魯王以疾薨年六十一此皆以駙馬襲封王爵者也唆兒火都者亦按陳之子以從征功在太祖朝遙授左丞相爲千戶仍賜以塗金銀章及金銀字海青圓符五驛馬券六其子曰阿哈駙馬當憲宗朝嘗率兵破徐州以功受賞黃金一錠白金十錠及銀鞍勒仍命襲父官至世祖時有詔弘吉刺萬戶所受驛券圓符皆仍其舊凡唆兒火都所受者宜皆收之而唆兒火都之諸孫若字羅沙伯顏蠻子添壽不花大都不花掌吉等及阿哈千戶之孫曰也速達兒與按陳之弟名冊者太祖世授官本藩蒙古軍站千戶冊之子曰哈兒哈孫以平金功賜號拔都兒哈兒哈孫之孫曰都羅兒至元四年授光祿大夫以銀章封懿國公有脫憐者亦按陳之裔孫也世祖授本藩千戶仍賜驛券圓符各四令以兵守朔土之怯魯連二十四年從族父按答兒禿征叛王乃顏有功亦賜號拔都兒脫憐卒子迸不刺嗣迸不刺卒子買住罕嗣買住罕尚拜答沙公主卒弟字羅帖木兒嗣以金章封也德王字羅帖木兒薨買住罕孫阿失襲千戶有名丑漢者按陳次子必哥之裔孫尚台忽魯都公主仁宗朝封安遠王以兵守莽來有答兒罕者亦特薛禪之裔孫也以從軍功世祖亦賜以拔都兒之號加賜黃金一錠其子

曰不只兒從征乃顏禽其黨金家奴帝賞以金帶其後有曰伯奢者即其孫也又按陳之孫納合尚太宗唆兒哈罕公主火忽之孫不只兒尚幹可眞公主又特薛禪諸孫有名脫羅禾者尚不魯罕公主繼尚闊闊倫公主此皆尚公主爲駙馬者也凡其女之爲后者自光獻翼聖皇后以降憲宗貞節皇后諱忽台及后妹也速兒皆按陳從孫忙哥陳之女世祖昭睿順聖皇后諱察必濟寧忠武王按陳之女其諱帖古倫者按陳孫脫憐之女諱喃必冊繼守正宮者納陳孫仙童之女成宗貞慈靜懿皇后諱寔憐答里幹羅陳之女也順宗昭獻元聖皇后諱答吉大德十一年十一月武宗冊上皇太后至大三年十月加上尊號曰儀天興聖慈仁昭懿壽元皇太后仁宗延祐二年加上尊號曰儀天興聖慈仁昭懿壽元全德泰寧福慶皇太后延祐七年又加徽文崇祐四字尊號太皇太后則按陳孫渾都帖木兒之女武宗宣慈惠聖皇后諱眞哥脫憐子迸不刺之女其諱速哥失里者按陳從孫哈兒只之女泰定皇后諱八不罕按陳孫幹留察兒之女其諱必罕諱速哥答里者皆脫憐孫買住罕之女文宗皇后諱不答失里瑯阿不刺魯王之女此則弘吉刺氏之爲后者也初弘吉刺氏族居於苦烈兒溫都兒斤迭烈木兒也里古納河之地歲甲戌太祖在迭蔑可兒時有旨分賜按陳及其弟火忽冊等農土若曰是苦烈兒溫都兒斤以與按陳及哈撒兒爲農土申論按陳曰可木兒溫都兒答兒腦兒迭蔑可兒等地汝則居之論冊曰阿刺忽馬乞迤東蒜吉納禿山木兒速拓哈海幹連直至阿只兒哈溫都

哈老哥魯等地汝則居之當以胡盧忽兒河北爲鄰按赤台爲界又諭火忽曰哈老溫迤東塗河潢河之間火兒赤納慶州之地與亦乞列思爲鄰汝則居之又諭按陳之子唆魯火都曰以汝父子能輸忠於國可木兒溫都兒迤東絡馬河至於赤山塗河迤南與國民爲鄰汝則居之至至元七年幹羅陳萬戶及其妃囊加眞公主請於朝曰本藩所受農土在上都東北二百里答兒海子寔本藩所駐夏之地可建城邑以居帝從之遂名其城爲應昌府二十二年改爲應昌路元貞元年濟寧王蠻子台亦尚囊加眞公主復與公主請於帝以應昌路東七百里駐冬之地期建城邑復從之大德元年名其城爲全寧路弘吉刺之分邑得任其陪臣爲達魯花赤者有濟寧路及濟兗單三州鉅野鄆城金鄉廣城碭山豐縣肥城任城魚臺沛縣單父嘉祥磁陽寧陽曲阜泗水一十六縣此丙申歲之所賜也至元六年陞古濟州爲濟寧府十八年始陞爲路而濟兗單三州隸焉又汀州路長汀寧化清流武平上杭連城六縣此至元十三年之所賜也又有未平路漳州盧龍遷安撫寧昌黎石城樂亭六縣此至大元年之所賜也若平江稻田一千五百頃則至大二年所賜也其應昌全寧等路則自達魯花赤總管以下諸官屬皆得專任其陪臣而王人不與焉此外復有王傳府自王傳六人而下其羣屬有錢糧人匠鷹房軍民車站管田稻田烟粉千戶總管提舉等官以署計者四十餘以員計者七百餘此可得而稽攷者也其五戶絲金鈔之數則丙申歲所賜濟寧路之三萬戶至元十八年所賜汀州路之四

萬戶絲以斤計者歲二千二百有奇鈔以錠計者歲一千六百有奇此則所謂歲賜者也

鎖兒哈

按元史本傳鎖兒哈事太宗與木華黎取嘉州降其民遣伯禿兒哈拙赤碣來獻捷帝曰若父宣力國家朕昔見之今鎖兒哈克光前烈賜以金錦金帶七寶鞍召至中都以疾薨鎖兒哈娶皇子幹赤女安禿公主生女是爲憲宗皇后子札忽兒臣從定宗出討萬奴有功太宗命親王安赤台以女也孫眞公主妻之薨贈推誠靖宣佐運贊治功臣太師開府儀同三司駙馬都尉上柱國襲封昌王諡忠靖札忽兒臣有子二人長月烈台娶皇子賽因主十女哈答罕公主生脫別台與乃顏戰有功次忽憐

鎖郎哈

按元史忽憐傳忽憐弟鎖郎哈娶皇子忙哥刺女奴兀倫公主生女是爲武宗仁獻章聖皇后寔生明宗

欽定古今圖書集成明倫彙編宮闈典
第一百十八卷目錄

外戚部列傳十六

明

- | | |
|-----|-----|
| 陳公 | 馬公 |
| 李傑 | 郭山甫 |
| 常遇春 | 呂本 |
| 馬全 | 徐達 |
| 張麒 | 張昶 |
| 張昇 | 胡榮 |
| 孫忠 | 孫繼宗 |
| 吳安 | 錢貴 |
| 汪泉 | 杭昱 |
| 周能 | 周或 |
| 王鎮 | 王源 |
| 王清 | 王濬 |
| 萬貴 | 邵喜 |
| 張巒 | 蔣輪 |
| 夏儒 | 陳萬言 |
| 方銳 | 杜林 |
| 李銘 | 陳景行 |
| 李偉 | 王偉 |
| 鄭成憲 | 王昇 |
| 劉文炳 | 張國紀 |
| 周奎 | 田弘遇 |

官闈典第一百十八卷

外戚部列傳十六

明

陳公

按明外史外戚傳陳公逸其名揚州人淳皇后父也
宋末從張世傑軍崖山世傑死陳公舟亦敗得脫棲
海島糧絕同棲者將往餽饘山食死馬陳公夢白衣
人戒曰勿往食夜有舟至可共載也寤而如戒是夕
又夢紫衣人杖扣之曰起起舟至矣陳公驚起則已
在元帥某舟中蓋公舊所事統領官降於元將憐而
載之也將有令毋留附舟人統領官匿之皇板下取
食飲從板隙投之事將洩忽颶風大發將懼甚統領
官白公有巫術令出而詛之風果止遂予公飲食送
歸揚州公由是棄軍籍避地盱眙以巫術行久之生
二女其季即淳皇后也公無子年九十九始卒洪武
二年追封揚王媼為王夫人立祠太廟東明年有言
王墓在盱眙者中都守臣按之信帝乃命中書省即
墓次立廟設祠祭署奉祀一人守墓戶二百一十家
世世復而諭翰林學士宋濂文其碑撤太廟東祠

馬公

按明外史外戚傳馬公逸其名高皇后父也宿州人
為人任俠負氣元末殺人亡命定遠與郭子興善以
季女屬子興後歸太祖即高皇后也馬公及妻鄭媼
皆前卒洪武二年追封徐王媼為王夫人建祠太廟
東皇后親奉安神主祀文稱孝女皇后馬氏謹奉皇
帝命致祭四年省祠命禮部尚書陶凱即宿州學次
立廟二十五年設祠祭署奉祀祀丞各一人王無後

以外親武忠武聚為之置灑掃戶九十三家永樂七
年帝北巡道宿州親謁祠下守塚武戡為建陽衛鎮
撫犯法逮至責而宥之十五年帝復親祭以戡為徐
州衛指揮僉事先是太祖欲訪后宗族授之官后力
辭而止故馬氏無顯者

李傑

按明外史李淑妃傳妃壽州人父傑洪武初以廣武
衛指揮北征卒於陣

郭山甫

按明外史郭寧妃傳妃濠人郭山甫女山甫善相人
太祖微時過其家山甫相之大驚曰公相貴不可言
因謂諸子子與英曰吾相汝曹皆可封侯者以此亟
遣從渡江并遣妃侍太祖後封皇寧妃累贈山甫營
國公子與英皆以功封侯另有傳

常遇春

按名山藏勳封記鄂國公常遇春定遠人以猛戰克
服吳漢平定中原北破開平擒元三王子還師道卒
年四十先與大將軍同致張士誠吳元年封公洪武
元年加銀青榮祿大夫上柱國兼太子太保二年加
贈翊運推誠宣德靖遠功臣開府儀同三司上柱國
太保中書左丞相追封開平王予諡

呂本

按明外史外戚傳本壽州人懿文太子次妃父也仕
元為元帥府都事後歸太祖授中書省令史出為湖
廣行省照磨洪武三年遷中書右司郎中轉左司五
年擢刑部侍郎尋拜吏部尚書六年改太常寺卿明

年四月御史臺言本奉職不謹方丘牲角非蘭栗功臣廟壞不修詔免官罰役功臣廟已釋為北平按察僉事時並命兵部員外郎楊基為山西按察副使御史答祿與權為廣西按察僉事帝召諭之曰風憲之設在肅紀綱清吏治非專理刑名爾等往修厥職務明大體毋倣俗吏拘繩墨善雖小為之不已將成全德過雖小積之不已將為大慙不見干雲之臺由寸土之積燎原之火由一燭之微可不慎哉本等頓首受命尋召為禮部尚書未幾出為兩浙都轉運鹽使十二年復授太常司卿逾二年卒無子賜葬鍾山之陰初太祖冊常遇春女為懿文太子妃洪武七年十月生子雄英又冊本女為太子妃十年十一月生子允炆即建文帝明年十一月常妃又生子允熈越十餘日常妃薨呂氏始獨居東宮是時皇太子並置二妃秦王亦納王保保妹為妃又以鄧愈女為配皆先代故事所無也

馬全

按明外史外戚傳全洪武中為光祿少卿二十八年冊其女為皇太孫妃太孫嗣位冊為皇后及都城陷后崩於火全不知所終

徐達

按名山藏勳封記魏國公徐達鳳陽人以鎮撫從起除帥領諸將竟定天下以大將軍生致張士誠封信國公洪武元年加銀青榮祿大夫上柱國錄軍國重事中書右丞相信國公兼太子太傅三年授開國輔運推誠宣力武臣特進光祿大夫左柱國太傅中書右丞相進封魏參軍國事祿五千石賜誥命鐵券與

誓謀逆不宥犯死身免二子免一賜綺帛百匹地若干頃佃戶若干戶守墳人百五十戶儀仗戶二十家第京師封十六年薨年五十四追封中山王予諡二十一年輝祖嗣以抗靖難師幽卒

按明外史本傳達子四輝祖添福膺緒增壽長女為文皇后次代王妃次安王妃

張麒

按明外史外戚傳麒永城人洪武中以女為燕世子妃授兵馬副指揮世子為太子進京衛指揮使尋卒洪熙元年追封彭城伯諡恭靖後進為侯

張昶

按明外史張麒傳麒二子昶昇並昭皇后兄也昶從成祖起兵取大寧戰鄭村壩有功授義勇中衛指揮同知已援薊州敗遼東軍還佐世子守北平永樂二年遷本衛指揮使三年調金吾右衛五年調錦衣衛昶嘗有過成祖戒之曰戚畹最當守法否則罪倍常人汝今富貴能不忘貧賤驕逸何自生若奢傲放縱凌虐下人必不爾恕爾尚慎之昶頓首謝十四年調府軍右衛仁宗立擢中軍都督府左都督俄封昶彭城伯子孫世襲洪熙改元掌五軍右哨軍馬英宗嗣位年幼太皇太后召昶兄弟誠諭之公朝政弗令預昶兄弟素恭謹因訓劾益自斂正統三年長子輔殺養子之久亡者論徙帝特宥之未幾昶卒輔病廢子瑾嗣以伯爵封輔命未下而輔卒初昶私蓄奄人瑾匿不舉事發下獄已獲釋瑾從弟玘天順中官錦衣衛副千戶飲千戶呂宏家懇雷歌妓與宿宏不聽遂抽刀刺宏宏創重死法當斬玘數陳冤乃援議親末

減詔不從迄如律成化十六年瑾卒子信嗣正德三年卒子欽嗣嘉靖八年革外戚世封惟張氏二伯得留其後嗣見世表

張昇

按明外史張麒傳昇字叔暉成祖起兵昇以舍人守北平有功授千戶永樂三年遷羽林前衛指揮僉事調府軍衛十二年從北征仁宗即位拜後府都督同知明年宣宗繼統進左都督掌左府事宣德四年二月勅諭昇曰卿舅氏至親日理劇務或以吏欺謾連不問則廢法問則傷恩其罷府事朝朔望官祿如舊稱朕優禮保全之意九年北征命掌都督府事留守京師英宗立太皇太后令弗預政大學士楊士奇稱昇賢宜加委任太后終不許正統五年兄昶已前卒太后念外氏惟昇一人封惠安伯子孫世襲明年卒子較早亡孫琮嗣琮卒弟瑛嗣瑛卒無子庶兄瓚嗣瓚卒子偉嗣弘治十二年以才充陝西總兵官鎮守固原明年五月孝宗御平臺召大學士劉健等出兵部推舉京營大將疏歷詢偉才命提督神機營御書勅以賜時人異之正德元年令參英國公張懋保國公朱暉提督團營三年加太子太保六年三月充總兵官偕都御史馬中錫督京兵討流賊劉六等偉但擁兵自衛朝議責其玩寇殃民召還俄御史吳堂劾其罪兵部請逮偉及中錫下獄論死遇赦獲釋停祿閒住十年請給祿為兵科所駁詔給其半十五年復督神機營世宗嗣位兼提督團營嘉靖二年敘奉迎防守功加太子太傅十四年偉卒贈太傅諡康靖子鏞嗣二十年言官交劾助威權豪家置店房科私稅

諸罪錮亦預焉坐輪贖還爵二十七年掌後府事居三年卒子元善嗣隆慶四年僉書後府事萬曆三十七年卒子慶臻嗣四十八年掌左府事崇禎元年九月命提督京營慶臻私請內閣於勅內增入兼管捕營捕營提督鄭其心計慶臻侵職帝怒詔改勅故大學士劉鴻訓至遣戍而慶臻以世臣止停祿二年後復起掌都督府十七年賊陷都城慶臻召親黨盡散貲財闔家自燔死南渡時贈太師惠安侯諡忠武合祀旌忠祠初世宗革外戚世爵惟彭城惠安獲存慶臻卒殉國難

胡榮

按明外史外戚傳榮濟寧人洪武中長女入宮爲女官授榮錦衣衛百戶末樂十五年將冊其第三女爲皇太孫妃擢光祿寺卿子安爲府軍前衛指揮僉事專侍太孫不泄事後太孫踐祚妃爲皇后安亦屢進官宣德三年后廢胡氏遂不振

孫忠

按明外史外戚傳忠字主敬鄉平人初名愚宣宗改曰忠兒時遇危疾父夢神告曰帝命我療兒及覺視之口有藥香旣長入國學除介休主簿調末城督夫營天壽山陵有勞遷鴻臚寺序班選其女入皇太孫宮宣宗卽位冊爲貴妃授忠中軍都督僉事宣德三年皇后胡氏廢貴妃爲皇后封忠爲會昌伯嘗謁告歸里御製詩賜之命中官輔行比還帝后車駕臨幸慰勞妻董夫人數召入宮賜賚弗絕正統中皇后爲皇太后忠生日太后使使賜其家時王振專權方枷祭酒李時勉於國學忠附奏臣荷恩厚願赦李祭酒

使爲臣客坐無祭酒臣不歡太后立言帝時勉乃獲釋忠家奴貸子錢於濱州民規利數倍有司望風奉行民不堪訴諸朝言官交章劾命執家奴戍邊忠不問景泰三年卒忠年八十五贈會昌侯諡康靖英宗復辟加贈太傅安國公改諡恭憲成化十五年再贈太師左柱國子五人繼宗顯宗紹宗續宗純宗純宗官錦衣衛指揮僉事早卒

孫繼宗

按明外史孫忠傳忠子繼宗字光輔章皇后兄也宣德初授府軍前衛指揮使久之改錦衣衛景泰初進都指揮僉事尋襲父爵天順改元以奪門功進爵爲侯加號奉天翊衛推誠宣力武臣特進光祿大夫柱國身免二死子免死世襲侯爵諸弟官都指揮僉事者俱改錦衣衛俄自言臣與弟顯宗率子壻家奴四十三人預奪門功乞加恩命由是顯宗進都指揮同知子璉授錦衣衛指揮使璉指揮使武忠進都指揮僉事蒼頭輩授官者復十七人五月命督五軍營戎務兼掌後軍都督府事左右又有爲紹宗求官者帝召李賢謂曰孫氏一門長封侯次皆顯秩子孫二十餘人悉得官足矣今又請以爲慰太后心不知初官其子弟請於太后數次後允不擇者累日曰何功於國濫授此秩物盛必衰一旦有罪吾不能庇矣賢頓首頌太后盛德因從容言宗祖以來外戚不典軍政帝曰初內侍言京營軍非屬皇舅不可故有斯舉太后實悔至今賢曰侯幸淳謹無害但後不可爲何耳帝曰然已錦衣遂果奏英國公張懋太平侯張瑾及繼宗紹宗並侵官地立私莊命各首實懋等具服帝

曰勛戚大臣已享厚祿復爲此法本難貸旣服罪姑宥之典莊者悉執問還其地於官石亨之獲罪也繼宗爲顯宗武忠及子孫家人軍件辭職帝止革家人軍件之授職者七人餘皆不問四年繼宗母安國夫人董氏卒年九十二恩恤有加五年曹欽平進太保尋以疾奏解兵柄辭太保不允憲宗嗣位復設十二團營命繼宗提督兼督五軍營帝開經筵命知經筵事修英宗實錄爲監修官朝有大議必繼宗爲首再覈奪門功惟繼宗侯如故成化初乞休優詔不許三年八月實錄成加太傅九年以四方災傷命停刷卷繼宗偕其餘請并停在京者御史楊守隨等言刷卷皆用官錢何病於民何傷於國良由繼宗等平日任情作奸多無案牘懼爲刷卷者所發故妄行瀆奏宜致於法帝不罪十年閏六月兵科給事中章鑑等劾其三宜退言繼宗總司兵柄垂二十年未聞展一籌以禦邊樹一勛以報國尸位素餐懷祿固寵宜亟退以保全終始於是繼宗上疏懇辭帝優詔許解營務仍准後府事知經筵預議大政繼宗復辭帝不許免其奏事承旨自景帝以前戚畹無典兵者帝見石亨張軫輩以營軍奪門故使親臣參之非故事也又五年繼宗卒年八十五贈鄉國公諡榮襄

吳安

按明外史外戚傳安丹徒人父彥名有女入侍宣宗於東宮生景帝宣德三年冊爲賢妃時彥名已卒授安錦衣衛百戶景帝嗣位尊妃爲皇太后安進本衛指揮使屢遷前府左都督弟信亦屢擢都督僉事景泰七年加恩舅氏封安安平伯信早亡官其弟敬爲

南京前軍左都督英宗復辟太后復稱賢妃降安為府軍前衛指揮僉事敬及其羣從南京錦衣衛指揮僉事智府軍前衛指揮同知喜山指揮僉事廣林錦衣衛千戶誠俱革職原籍間住尋命安為錦衣衛指揮使子孫世襲

錢貴

按明外史外戚傳貴海州人英宗睿皇后父也祖整從成祖起兵為燕山護衛副千戶父通嗣職官至金吾右衛指揮使貴嗣祖職數從成祖宣宗北征屢遷都指揮僉事正統七年后將正位中宮擢貴中府都督同知英宗數欲封之后輒遜謝故后外家獨不獲封貴卒長子欽為錦衣衛指揮使與弟鍾俱歿於土木欽無子鍾遺腹子雄為之後年幼以父錦衣故秩予優給天順改元擢本衛都指揮使貴妻陳氏后生母也訴貴弟禮欺雄孤弱使酒忿詈乞歸南京守祖墓母使為國戚玷詔錦衣衛執問之雄尋擢都督同知成化時后崩憲宗優生母外家周氏而薄錢氏故后家亦不獲封雄卒子承宗亦屢官錦衣都指揮使弘治二年四月承宗祖母王氏援憲宗外家王氏例請封吏部為覆請乃封承宗安昌伯世襲先是勛臣莊田命有司代收其稅至是王氏乞自收乃命通行府州縣願自收者聽而禁管莊者橫肆嘉靖五年承宗卒諡榮僖子維圻嗣尋卒承宗母請以庶長子維垣嗣詔授錦衣衛指揮使已又請嗣伯爵世宗以外戚世封非祖制下廷臣議八年十月上議曰祖宗之制非軍功不封洪熙時都督張昶始以外戚封彭城伯其弟昇亦以都督乞封惠安伯外戚之封自此

始其後侯孫忠周壽王源伯周或王清王濬皆援張昶例又其後伯錢承宗公張鶴齡復援王源例循習今至有一門而並公侯者有一時而並侯伯者有兄弟三人而並三侯伯者爵賞無章歲糜厚祿曩開國靖難之助封者不滿五十人未幾罷去者十有九人後雖收錄不過指揮彼託屬掖廷一門數貴而傳襲三四世不已踰分乎臣等謹議魏定二公雖係戚里實佐命元勛彭城惠安二伯即以恩澤封而軍功參半其餘外戚恩封襲者宜終其身毋得請襲有出特恩一時寵錫者量授指揮千百戶之職終其身有妄引洪熙以後例上請者聽吏部科道官糾彈置之重典以為貪冒不知止者之戒世宗俞其議命魏定彭城惠安襲封如故餘止終本身著為令維垣遂不得襲以錦衣終

汪泉

按明外史外戚傳泉世為金吾左衛指揮使家京師正統十年其子瑛有女將冊為邸王妃乃授瑛為中城兵馬司指揮食祿不視事妃正位中宮進泉都指揮同知府軍衛帶俸瑛錦衣衛指揮使泉瑛尋擢左都督瑛弟亦授錦衣千戶有差英宗復位泉仍居金吾舊職瑛錦衣舊職其四弟皆奪官還故里尋命瑛錦衣指揮僉事子孫世襲

杭昱

按明外史外戚傳昱女為景帝妃生子見濟景泰三年帝欲廢英宗子而立己子乃廢皇后汪氏冊妃為后昱累官錦衣衛指揮使兄聚授錦衣千戶聚尋卒賜賻及祭葬七年后崩官其弟敏錦衣百戶英宗復

辟盡奪景帝所授外親官尤惡杭氏昱已前卒敏削職還里

周能

按明外史外戚傳能字廷舉昌平人女為英宗貴妃生憲宗是為孝肅皇太后英宗復位見能於便殿授錦衣衛千戶賜賚甚渥能卒長子壽嗣職憲宗踐祚擢左府都督同知成化三年封慶雲伯贈能慶雲侯壽以太后弟頗恣橫時方禁助戚請乞莊田壽獨冒禁乞通州田六十二頃憲宗不得已與之嘗奉使道呂梁洪多挾商艘主事謝敬不可壽與閭且劾之敬坐落職十七年進爵為侯其子弟同日授錦衣官者七人能追贈太傅寧國公諡榮靖孝宗嗣位加太保時壽所賜莊田甚多其在寶坻者已得五百頃又欲得其餘七百餘頃詭言以私財相易部劾其貪求無厭執不許孝宗竟許之又與建昌侯張延齡爭田兩家奴相毆致交章上聞爭不已又數撓鹽法侵公家利有司厭苦之十六年加太傅弟長寧伯或亦加太保兄弟並為侯伯位三公前此未有也武宗立法傳奉官壽子姪錦衣衛指揮使瑾等八人亦在汰中壽上章乞畱從之以正德四年卒贈寧國公諡恭和子瑛嗣封殖過於父嘉靖中於河西務設肆邀商貨虐市民虧國課為御史巡按者所劾停祿三月而瑛怙惡如故又為主事翁萬達所劾詔革其廕肆下家人於法司時已革外戚世爵瑛卒遂不得嗣

周或

按明外史外戚傳或太后仲弟也初官錦衣衛指揮使成化十七年擢左府都督同知二十一年封長寧

伯世襲弘治中外威嚴營私利或與壽寧侯張鶴齡至聚衆相鬪都下震駭九年九月尚書屠浦偕九卿上言曩憲宗皇帝詔勸戚之家不得占據關津險澤設肆列廛侵奪民利違者許所在官司執治以聞皇上踐極亦惟先帝之法是訓是遵而助戚諸臣不能恪守先詔縱令家人列肆通衢邀截商貨都城內外所有之賭永樂間榜例王公僕從二十人一品不過十二人今助戚多者以百數大乖舊制其間多市井無賴冒名罔利利歸羣小怨叢一身非計之得運

者長寧伯周或壽寧侯張鶴齡兩家以瑣事忿爭喧傳都邑上徹宸居失戚里之觀瞻損朝廷之威重伏望皇上綸音戒諭俾各修舊好毋間親義凡有店肆悉皆停止更勅都察院揭榜禁戒有助戚家人擾害商賈侵奪民利者聽巡城巡按御史及所在有司執治仍考末樂間榜例裁定助戚家人不得濫收時科道亦以爲言帝嘉納之十八年進太保或求爲侯吏部言封爵出自朝廷無請乞者乃止武宗立悉擢或子璫等六人爲錦衣官尋卒傳子璫孫大經及曾孫世臣嘉靖二十八年降授錦衣衛指揮同知先是周太后有弟吉祥兒時出遊去爲僧家莫知所在太后久忘之矣一夕夢神言后弟宿報國寺伽藍殿小寺中英宗夢亦如之且遣小黃門以夢求果得吉祥太后與之言而泣欲爵之不可厚賜遣還寺憲宗立爲建大慈仁寺賜莊田數百頃其後周氏衰落惟吉祥寺田久猶存

王鎮

按明外史外戚傳鎮字克安上元人憲宗純皇后父

也憲宗嗣位冊后爲妃授鎮金吾左衛指揮使未幾后將正位中宮拜中軍都督同知成化四年進右都督鎮爲人厚重清謹雖居榮寵不改其素人稱長者十年六月卒弘治五年追封阜國公諡康穆子三人源清溶

王源

按明外史王鎮傳鎮長子源字宗本后弟也父卒授錦衣衛都指揮使外戚例有賜田源已獲賜又多侵民業十六年夏爲六科給事中王垣等所劾言戶部郎中張禎叔等奉命按視靜海縣外戚所占田及其家奴怙勢害民諸事已皆得實竊惟永樂宣德間許畿輔八郡民盡力懇荒未免其稅所以培國本重王畿萬世子孫當遵守也外戚王源賜田初止二十七頃版冊昭然乃令其家奴別立四至占奪民產至二千二百二十頃有奇可耕者三百六十六頃中多貧民成熟之地朝廷因其請乞并以賜之及貧民赴告下御史劉喬覆按喬徇情曲奏致源無忌憚家奴益橫今禎叔等再按得實乞自二十七頃之外悉還民并治喬欺罔罪帝不悅切責之後詔禁外戚侵民產源乃悉以所占歸舊主人謂其能補過十八年擢中軍都督同知二十年封瑞安伯弘治五年進侯十六年加太保武宗登極加太傅屢增祿至七百石源躬長者行不媿其父以嘉靖三年卒贈太師諡榮靖子橋嗣伯爵後以例革

王清

按明外史王鎮傳鎮次子清亦后弟成化十八年授錦衣衛千戶久之進本衛指揮使再進中軍都督同

知弘治六年封崇善伯武宗嗣位加太保以嘉靖十三年卒子極以例降錦衣指揮同知

王溶

按明外史王鎮傳鎮三子溶以成化十八年授錦衣衛百戶兄清擢指揮使溶代爲千戶及清擢都督溶復代爲指揮使清封伯溶即拜中軍都督同知尋進右都督武宗踐阼轉左都督正德二年封安仁伯踰月卒贈侯溶兄弟三人並貴顯皆謙慎守禮在戚里中以賢稱子桓嗣爵後革

萬貴

按明外史外戚傳貴憲宗萬貴妃之父也以妃父歷官錦衣衛指揮使貴頗謹飭每受賜輒憂形於色曰吾起掾史編尺伍蒙天子恩備戚屬子姓皆得官福過災生未知稅駕矣時貴妃方擅寵貴子喜爲指揮使通爲正千戶達爲副千戶並驕橫貴每見諸子屑越賜物輒戒曰官所賜皆著籍他日復宣索汝曹無以應矣諸子皆笑以爲迂成化十年卒贈祭葬有加十四年進喜都指揮同知通指揮使達指揮僉事通少貧賤業賣既驟貴益貪無賴子爭附之誘以作奸犯科造奇巧邀利中官章典梁芳等復爲左右每進一物輒傾內庫償犖金錢絡繹不絕通妻王出入宮掖大學士萬安附通爲同宗婢僕朝夕至王所謁起居妖人李孜省輩皆緣喜進朝野因是匱乏通死帝眷萬氏不已遷喜都督同知達指揮同知通庶子從喜方二歲養子牛兒方四歲俱授官憲宗崩言官劾其罪狀孝宗乃奪喜等官而盡追封諡及內帑賜物如貴言